



Irsyad al-Fatwa

HUKUM SUNTIKAN VAKSIN COVID-19

1. Mesyuarat Jawatankuasa Fatwa Negeri Pulau Pinang Bil. 01/2021 pada 13 Rejab 1442 bersamaan 25 Februari 2021 telah bersetuju menerima dan mengguna pakai keputusan Mesyuarat Khas Jawatankuasa Muzakarah Majlis Kebangsaan Bagi Hal Ehwal Ugama Islam (MKI) kali ke-10 bertarikh 3 Disember 2020 yang memutuskan bahawa;

“Hukum penggunaan Vaksin COVID-19 adalah harus, dan ia wajib diambil oleh golongan yang ditetapkan pihak berkuasa.”

2. Tindakan mengambil vaksin adalah bertepatan kewajipan menjaga keselamatan nyawa dan mengelak kemudaratan sebagaimana yang ditegaskan dalam syariat berdasarkan sumber-sumber hukum berikut:

- i. Firman Allah *سُبْحَانَهُ وَتَعَالَى*:

يَا أَيُّهَا الَّذِينَ ءَامَنُوا خُذُوا حِذْرَكُمْ فَانفِرُوا تُبَاتٍ أَوْ بَارِعًا جَمِيعًا

Maksudnya: *“Wahai orang-orang yang beriman, bersedialah dan berjaga-jagalah (sebelum kamu menghadapi musuh), kemudian (bila dikehendaki) maralah (ke medan perang) sepuak demi sepuak, atau (jika perlu) maralah serentak beramai-ramai.”*

(Surah al-Nisa': 71)

Dalam konteks semasa mengharuskan suntikan Vaksin Covid-19 juga termasuk persiapan yang dibuat oleh pihak kerajaan dalam memerangi musuh negara ketika ini iaitu pandemik Covid-19 yang telah mengancam banyak nyawa manusia.

- ii. Firman Allah *سُبْحَانَهُ وَتَعَالَى*:

وَمَنْ أَحْيَاهَا فَكَأَنَّمَا أَحْيَا النَّاسَ جَمِيعًا

Maksudnya: *“Barang siapa memelihara kehidupan seseorang manusia maka seakan-akan dia telah memelihara kehidupan semua manusia.”*

(Surah al-Maidah: 32)

iii. Firman Allah *سُبْحَانَهُ وَتَعَالَى*:

فَسْأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ ﴿٤٣﴾

Maksudnya: "Oleh itu bertanyalah kamu kepada orang-orang yang berpengetahuan jika kamu tidak mengetahui."

(Surah al-Nahl: 43)

Dalam konteks ayat ini, vaksin telah diperakui oleh pakar kesihatan berautoriti sebagai langkah terbaik membendung penularan wabak COVID-19 ketika ini. Vaksin yang ada juga disahkan bebas sumber haiwan yang meragukan. Justeru, vaksin ini menjadi ikhtiar terbaik umat Islam pada waktu ini.

iv. Sabda Nabi *صَلَّى اللهُ عَلَيْهِ وَسَلَّمَ* :

عَنْ أُسَامَةَ بْنِ شَرِيكٍ، قَالَ شَهِدْتُ الْأَعْرَابَ يَسْأَلُونَ النَّبِيَّ صَلَّى اللهُ عَلَيْهِ وَسَلَّمَ أَعْلَيْنَا حَرْجٌ فِي كَذَا أَعْلَيْنَا حَرْجٌ فِي كَذَا فَقَالَ لَهُمْ "عِبَادَ اللَّهِ وَضَعَ اللَّهُ الْحَرْجَ إِلَّا مَنْ اقْتَرَضَ مِنْ عَرِيضِهِ شَيْئًا فَذَلِكَ الَّذِي حَرْجٌ". فَقَالُوا يَا رَسُولَ اللَّهِ هَلْ عَلَيْنَا جُنَاحٌ أَنْ نَتَدَاوَى قَالَ: "تَدَاوُوا عِبَادَ اللَّهِ فَإِنَّ اللَّهَ سُبْحَانَهُ لَمْ يَضَعْ دَاءً إِلَّا وَضَعَ مَعَهُ شِفَاءً إِلَّا الْهَرَمَ"

Maksudnya: *Diriwayatkan bahawa Usamah bin Sharik berkata: "Saya melihat orang Badwi bertanya kepada Nabi صَلَّى اللهُ عَلَيْهِ وَسَلَّمَ: 'Apakah ada keburukan dalam hal itu, apakah ada keburukan dalam hal itu?' Dia berkata kepada mereka: 'Hai hamba-hamba Allah! Allah hanya membuat kerosakan pada perkara yang melampaui kehormatan saudara. Itulah yang berdosa.' Mereka berkata: 'Ya Rasulullah! Adakah berdosa jika kami mendapatkan rawatan?' Dia berkata: 'Carilah rawatan, wahai hamba Allah! Kerana Allah tidak menciptakan penyakit, tetapi Dia juga menciptakan kesembuhan, kecuali usia tua.*

(Riwayat Ibn Majah)

v. Pandangan Fuqaha' dalam kewajipan seseorang menjaga diri daripada terjebak dalam kemudaratan merujuk kaedah fiqihyah iaitu;

a) ((الضرار يزال)) iaitu kemudaratan hendaklah dihapuskan, dan

b) ((الضرار يدفع بقدر الأمكان)) iaitu kemudaratan perlu dibendung semampu yang dapat dilakukan.

3. Berdasarkan prinsip Maqasid Syar'iyah, mengambil suntikan vaksin adalah suatu usaha dalam memelihara dan menjaga nyawa (حفظ النفس) yang merupakan suatu kewajipan selain daripada menjaga agama, keturunan, akal dan harta. Justeru, umat Islam diseru agar tidak merasa ragu-ragu untuk mengambil suntikan Vaksin COVID-19.

4. Selain itu, sebagai rakyat hendaklah patuh dan taat terhadap ketetapan dan tindakan pihak kerajaan (أولى الأمر) dalam melaksanakan Pelan Imunisasi COVID-19 Kebangsaan dalam usaha mengekang penularan wabak Covid-19 berdasarkan;

((تصرف الإمام على الرعية منوط بالمصلحة))

iaitu tindakan yang dijalankan oleh pemerintah terhadap rakyat demi kemaslahatan.

Dalam konteks ini, pihak kerajaan berhak membuat keputusan berpandukan kepada kemaslahatan rakyat dengan berlandaskan syariat Islam. Suntikan Vaksin Covid-19 adalah suatu usaha pihak kerajaan bertujuan untuk menyelamatkan manusia daripada kematian walaupun masih belum dijangkiti wabak ini.

5. Berlandaskan sandaran-sandaran hukum di atas maka Jabatan Mufti Negeri Pulau Pinang mengajak masyarakat Islam khususnya di negeri ini bersama-sama membantu mengekang penularan wabak Covid-19 dengan bersedia untuk menerima suntikan vaksin.

Mudah-mudahan Allah سُبْحَانَهُ وَتَعَالَى melindungi kita daripada musibah dan kemudaratan serta mengangkat musibah COVID-19 yang menimpa negeri dan negara kita pada masa kini.

والله أعلم.

"حسبنا الله ونعم الوكيل لا حول ولا قوة إلا بالله العلي العظيم"

Disahkan oleh;



DATO' SERI DR. WAN SALIM BIN WAN MOHD NOOR
Mufti Kerajaan Negeri Pulau Pinang
Merangkap Pengerusi Jawatankuasa Fatwa Negeri Pulau Pinang

Tarikh: **3 Jun 2021 bersamaan 22 Syawal 1442**